



## 7.1 juta isi rumah terima manfaat Jualan Agro Madani

Oleh Nuraliaawati Sabri - Oktober 31, 2023 @ 10:48pm

bhnews@bh.com.my

MELAKA: Sejumlah RM100 juta disasarkan Lembaga Pemasaran Pertanian Persekutuan (FAMA) menerusi Program Jualan Agro Madani yang dijalankan di seluruh negara sepanjang tahun ini.

Pengarah Kanan Pemasaran Segar FAMA, Shahrizan Sudiman, berkata program jualan yang bermula sejak April lalu dan akan berakhir hujung tahun ini membabitkan sebanyak 5,000 penganjuran secara keseluruhan.

"Sehingga 29 Oktober lalu (Ahad) kita sudah laksanakan lebih 3,500 jualan dengan nilai jualan direkodkan sejumlah kira-kira RM64 juta. Dengan berbaki lebih 1,300 penganjuran lagi kita yakin sasaran RM100 juta nilai jualan dapat diperoleh.

"Sepanjang penganjuran Jualan Agro Madani ini juga ia sudah memberi manfaat kepada 7.1 juta isi rumah dan selepas ini lebih ramai yang akan mendapat manfaat menerusi penganjuran jualan ini," katanya.

Beliau berkata demikian pada sidang media selepas Program Jualan Agro Madani @Cuepacs yang dirasmikan Presiden Kongres Kesatuan Pekerja-Pekerja Di Dalam Perkhidmatan Awam (CUEPACS), Datuk Dr Adnan Mat di Dataran Majlis Bandaraya Bersejarah (MBMB), Ayer Keroh, hari ini.

Shahrizan berkata, penganjuran jualan itu bukan sahaja memberi manfaat kepada pengguna malah usahawan FAMA terutamanya apabila turut membabitkan 54,000 usahawan.

"Dengan disertai 54,000 usahawan ia amat memberangsang malah secara tidak langsung dapat membantu mereka memasarkan produk jualan.

"Selain barang keperluan asas seperti beras putih tempatan, telur dan minyak, turut dijual pada jualan ini adalah ikan, ayam, daging, sayur-sayuran serta buah-buahan.

"Untuk Jualan Agro Madani ini lokasi penganjuran kita fokuskan di tiga tempat iaitu sekitar pejabat kerajaan, kawasan perumahan berkepadatan tinggi dan juga di outlet FAMA seluruh negara," katanya.

Menurut Shahrizan, program Jualan Agro Madani ini akan diteruskan pada tahun hadapan yang juga akan membabitkan 5,000 penganjuran untuk sepanjang tahun.